



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2015. GODINU REGIONALNOG DEMOKRATSKOG SAVEZA TUZLA

Broj: 03-07-6-525/16  
Sarajevo, 30.01.2017. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1 NALAZI .....	5
5.2 PREPORUKE .....	6

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Regionalnog demokratskog saveza Tuzla za 2015. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

**Pregledom godišnjeg finansijskog izvještaja za 2015. godinu, utvrđeno je da je Regionalni demokratski savez Tuzla prekršio odredbe člana 5. stav (4), člana 11. i člana 12. stav (1) i stav (3) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Regionalnog demokratskog saveza Tuzla za 2015. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Regionalni demokratski savez Tuzla se finansirao iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	5.462,00	100,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	0,00	0,00
8.	Prihodi od propagande ( 3-g )	0,00	0,00
9.	Ostali prihodi	0,00	0,00
<b>I</b>	<b>Ukupni prihodi (1-9)</b>	<b>5.462,00</b>	<b>100,00</b>
<b>II</b>	<b>Kreditno zaduženje kod banaka</b>	<b>0,00</b>	<b>0,00</b>
	<b>Izvori finansiranja (I+II)</b>	<b>5.462,00</b>	<b>100,00</b>

U godišnjem finansijskom izvještaju stranka iskazala je ukupne rashode u iznosu od 7.060,24 KM.

## 2. PREDSTAVLJANJE POLITIČKE STRANKE

Naziv političke stranke: Regionalni demokratski savez Tuzla. Skraćeni naziv stranke: RDS Tuzla. Regionalni demokratski savez Tuzla je upisan u registar političkih organizacija kod Općinskog suda u Tuzli rješenjem broj: 032-0-Reg-13-001757 od 18.11.2013. godine.

Sjedište političke stranke je u Tuzli, ulica Druge Tuzlanske brigade br. 40.

Lice ovlašteno za zastupanje je Alija Azabagić, predsjednik stranke.

Lice ovlašteno za podnošenje finansijskih izvještaja za 2015. godinu je Mirsad Karamehić.

Prema podacima iz godišnjeg finansijskog izvještaja za 2015. godinu organizacionu strukturu Regionalnog demokratskog saveza čine:

- Glavni odbor,
- Predsjedništvo stranke,
- Kantonalni odbor Tuzlanskog kantona i
- Općinski odbor Tuzla.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Regionalnog demokratskog saveza Tuzla za 2015. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Regionalnog demokratskog saveza Tuzla obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE KONTROLE I REVIZIJE

Nakon izvršenog pregleda godišnjeg finansijskog izvještaja za 2014. godinu, Služba za reviziju je izdala izvještaj o pregledu sa mišljenjem revizora, nalazima revizije i preporukama stranci da vodi evidencije o prijemljenim priložima i izdaje potvrde o prijemu priloga, da primljene donacije uplaćuje na transakcioni račun u zakonom predviđenom roku, da uspostavi adekvatne evidencije o prihodima i rashodima u svojim poslovnim knjigama i da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanom roku i popunjava u skladu sa Pravilnikom o godišnjim finansijskim izvještajima političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2015. godinu, utvrđeno je da Regionalni demokratski savez Tuzla nije ispoštovao sve date preporuke

### 5. NALAZI I PREPORUKE

#### 5.1 NALAZI

**a) Na osnovu obavljenog pregleda, utvrđeno je da je Regionalni demokratski savez Tuzla prekršio odredbe člana 5. stav (4)<sup>1</sup> Zakona o finansiranju političkih stranaka.**

Uvidom u poslovne knjige utvrđeno je da stranka nije evidentirala nenovčanu donaciju po osnovu besplatnog korištenja poslovnog prostora i nije pravnom licu izdala potvrdu u skladu sa odredbom člana 6. stav (1) Pravilnika o godišnjim finansijskim izvještajima političkih stranaka, čime su prekršene odredbe člana 5. stav (4) Zakona o finansiranju političkih stranaka.

Na osnovu ugovora o zakupu poslovnog prostora broj: 386/13 od 04.12.2013. godine između „Giprom“ d.o.o Tuzla<sup>2</sup> i Regionalnog demokratskog saveza Tuzla na neodređeno vrijeme, stranka je koristila poslovni prostor pravnog lica bez naknade.

Regionalni demokratski savez Tuzla je korištenjem poslovnog prostora u vlasništvu pravnog lica, bez plaćanja zakupnine, primio nenovčanu donacije, koju je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka imao

<sup>1</sup> Političke partije dužne su da vode evidenciju o prijemu članarina i dobrovoljnih priloga, te da izdaju potvrde o prijemu članarina i dobrovoljnih priloga. Ovlašćeno lice u političkoj partiji uplaćuje članarinu i dobrovoljne priloge neposredno na transakcijski račun političke partije najkasnije u roku od 10 dana od dana prijema uplate.

<sup>2</sup> Stranka je za svoje sjedište koristila poslovni prostor pravnog lica GIPROM doo Tuzla bez naknade.

obavezu da evidentira u poslovnim knjigama i prijavi u godišnjem finansijskom izvještaju za 2015. godinu.

**b) Regionalni demokratski savez Tuzla prekršio je odredbe člana 11. i člana 12. stav (1) i (3) Zakona o finansiranju političkih stranaka.**

Na osnovu obavljenog pregleda, utvrđeno je da Regionalni demokratski savez Tuzla nije uspostavio evidencije o svojim prihodima i rashodima, finansijski izvještaj nije dostavio u zakonom predviđenom roku, niti je pojedine obrasce godišnjeg finansijskog izvještaja za 2015. godinu popunio u skladu sa Pravilnikom o godišnjim finansijskim izvještajima političkih stranaka - u daljem tekstu: Pravilnik, čime je prekršio odredbe člana 11. i člana 12. stav (1) i (3) Zakona o finansiranju političkih stranaka<sup>3</sup>.

(1) Regionalni demokratski savez Tuzla je godišnji finansijski izvještaj za 2015. godinu dostavio dana 09.05.2016. godine, tj. nakon zakonom predviđenog roka, čime je prekršio odredbe člana 12. stav (3) Zakona o finansiranju političkih stranaka<sup>4</sup>.

(2) Uvidom u poslovne knjige stranke, utvrđeno je da stranka u okviru svojih troškova i prihoda nije evidentirala troškove zakupa, odnosno nenovčanu donaciju koju je ostvarila korištenjem poslovnog prostora bez naknade.

U obrascu 3-e (nenovčane donacije i računi koje politička stranka nije imala obavezu platiti) finansijskog izvještaja stranka nije iskazala prihode po osnovu zakupa poslovnog prostora bez naknade, čime je prekršila odredbe člana 13. i 18. Pravilnika.

U obrascu 4.1 (režijsko-administrativni i ostali troškovi) finansijskog izvještaja stranka nije iskazala troškove zakupa poslovnog prostora, čime je prekršila odredbe člana 21. i 22. Pravilnika.

## **5.2 PREPORUKE**

***Preporučuje se Regionalnom demokratskom savezu Tuzla da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- ***da vodi evidencije o prijemljenim priložima i izdaje potvrde o prijemu priloga,***
- ***da uspostavi adekvatne evidencije o prihodima i rashodima u svojim poslovnim knjigama i***
- ***da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanom roku i popunjava u skladu sa Pravilnikom o godišnjim finansijskim izvještajima političkih stranaka.***

## **KOMENTAR**

U ostavljenom roku, Regionalni demokratski savez Tuzla nije se očitovao na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2015. godinu.

šef Odsjeka za revizijske poslove, revizor

šef Službe za reviziju

Sanja Tošović

Mr. sc. Hasida Gušić

Revizor

Nevenko Andan

<sup>3</sup> („Službeni glasnik BiH“ broj: 95/12).

<sup>4</sup> U skladu sa odredbom člana 12. stav (3) Zakona o finansiranju političkih stranaka, stranka je obavezna podnositi finansijski izvještaj do 31. marta naredne godine, u formi koju odobri Centralna izborna komisija Bosne i Hercegovine. Sadržaj, forma, način i drugi detalji izvještavanja uređeni su Pravilnikom o godišnjim finansijskim izvještajima političkih stranaka („Službeni glasnik BiH“ broj 96/13).